

Dr.sc. Zijad  
**LUGAVIĆ**  
GRADONAČELNIK TUZLE

# Poštenje, iskustvo, znanje.

PROGRAM RADA  
**2023 - 2024**



## UVOD

Naša Tuzla je po mnogo čemu drugačija i bolja od drugih. Čast mi je što građankama i građanima Tuzle mogu predstaviti svoj program rada.

Program rada za period 2023.-2024. godina predstavlja dokument koji definiše pravce i ciljeve mog djelovanja, kao gradonačelnika grada Tuzle, u narednom periodu. Samtram da je ovaj dokument veoma značajan za naše građane i građanke, te da mora biti objektivna, sveobuhvatan i konkretan, a ne populistički. Stoga je moj program rada, proizašao iz intenzivnih razgovora sa građanima, privrednicima, nevladinim organizacijama, i drugim aktima, te je definisan kroz VII oblasti i 60 aktivnost za održivi razvoj našeg Grada i temelji se na tri osnovne dimenzije održivog razvoja, koji je usklađen i sa UN-ovim ciljevima održivog razvoja, i to: društvo, okoliš i ekonomski razvoj. Program je ujedno i univerzalni poziv svima nama na zajedničku akciju u cilju unapređenja kvaliteta života svih građana i građanki, borbe za čišći zrak, energetska i digitalna tranzicija, ravnopravan i ravnopravan razvoj bez diskriminacije, veću uključenost mladih kod donošenja odluka, obezbjeđivanje stabilnosti i prosperiteta za sve građane, očuvanje zajedničkog života i njegovanje tekovina antifašizma. Ovih VII oblasti je međusobno povezano budući da ključ uspjeha jednog cilja leži u sagledavanju izazova koji su svojstveni nekom drugom cilju, a razvoj je neodvojiv od ravnoteže između socijalnog, ekonomskog i aspekta održivosti životne sredine, te ne smije biti na štetu ovih aspekata. Moj tim i ja ćemo uložiti svu svoju kreativnost, znanje i iskustvo da se ovi ciljevi dostignu u svakom kontekstu.

Zajedno sa Vama za našu Tuzlu.

# IZJAVA – OPĆI CILJ DJELOVANJA

Kao doktor ekonomskih nauka sa velikim iskustvom u realnom sektoru i radu gradske uprave obećavam: apsolutnu posvećenost zajedničkom životu i ostanku mladih, ekonomskom razvoju, rješavanju ekoloških i socijalnih problema, novim tehnologijama, unapređenju saobraćaja i komunalne infrastrukture i svemu što doprinosi boljem kvalitetu života građana.



Moji ključni ciljevi su: ekonomski održiv razvoj, što bolji kvalitet života građana i što veća uključenost građana.

## 1. EKONOMSKI ODRŽIV RAZVOJ

Ekonomski razvoj je moja struka, ekonomija i Tuzla su moje velike ljubavi. Kao doktor ekonomskih nauka koji je doktorirao na digitalizaciji, svjestan sam značaja digitalizacije javne uprave i svih javnih usluga iz nadležnosti lokalne samouprave, kako bi se unaprijedio ambijent za investiranje i olakšao pristup javnim uslugama svim građanima. **Rezultati mog dosadašnjeg rada dokaz su da mogu, znam i hoću sačuvati postignuto i ubrzati pravce razvoja Tuzle.**

Godinama sam u gradskoj upravi rukovodio ekonomskim razvojem Tuzle. Svojevremeno sam bio i izvršni direktor za Bosnu i Hercegovinu, u to doba najveće regionalne trgovinske firme. To mi je pomoglo da danas razumijem i javni i realni sektor.

Nekoliko godina sam rukovodio i službom koja se bavi saradnjom sa nevladinim sektorom. Ovo govorim zato što je sklad vladinog, privatnog i nevladinog sektora, garant sigurnog razvoja.

Tuzla već sada bilježi konstantan porast broja zaposlenih osoba, broja poslovnih subjekata, prihoda po glavi stanovnika, investitora, turista... Po svim pokazateljima ekonomskog razvoja Tuzla je lider u Tuzlanskom kantonu i u vrhu ljestvice u Federaciji i Bosni i Hercegovini. Želim i više i bolje. Nastavit ćemo sa podrškom novoregistrovanim poslovnim subjektima, ubrzati rad administracije na dozvolama, poboljšavati komunalnu infrastrukturu, razvijati poslovne zone, donositi regulacione planove i tako stvarati uslove za razvoj.

## 2. ŠTO BOLJI KVALITET ŽIVOTA GRAĐANA

Cilj mi je da se sačuva postojeći i poboljša budući kvalitet života građana i građanki. Vidjeli smo rezultate istraživanja koje pokazuje da je život u Tuzli najjeftiniji u regiji. To je ponajviše zato što su komunalne usluge kvalitetne i istovremeno najjeftinije, a prosječna plata bolja nego u drugim gradovima regije.

Imamo najbolje i najjeftinije grijanje u Bosni i Hercegovini. Usluge Panonike su nekoliko puta jeftinije u odnosu na slične usluge u regiji. Tako će i ostati, pod uslovom da spriječimo uporne pokušaje privatizacije Panonike, Vodovoda, Centralnog grijanja i drugih komunalnih preduzeća.

**Dok sam ja gradonačelnik, to se neće desiti. Ne damo nikome Tuzlu i imovinu koja pripada svim građanima Tuzle.**

## 3. ŠTO VEĆA UKLJUČENOST GRAĐANA

I sada imamo uključenost građana u sve naše procese, ali ja to želim unaprijediti većim uključivanjem mladih u donošenje odluka. Uključenost mladih je jedan od načina borbe za ostanak mladih u Tuzli. Mladima garantujem jednake šanse za uspjeh. Moj tim i ja imamo konkretan i bogat program vezan za položaj mladih i za njihov ostanak.

Tuzla je simbol zajedničkog života, poštivanja osnovnih ljudskih prava i njegovanja tekovina antifašizma. To tako mora i ostati.

Prioriteti mog rada će biti usko povezani i sa stvaranjem uslova za veliki broj razvojnih investicija. Zato ćemo jačati službe za upravu i povećavati efikasnost njihovog rada. Poseban fokus će nam biti stvaranje boljeg ambijenta za ostanak mladih kao i dalje povećanje socijalne osjetljivosti prema ranjivim kategorijama, dalji razvoj u oblasti kulture i sporta, više dječijih igrališta i obdaništa, te njegovanje tekovina zajedničkog života i antifašizma.

## OPERATIVNI CILJEVI RADA

Operativni ciljevi mog djelovanja u budućem radu su međusobno povezani, budući da ključ uspjeha jednog cilja leži u sagledavanju izazova koji su svojstveni nekom drugom cilju, a razvoj je neodvojiv od ravnoteže između socijalnog, ekonomskog, aspekta održivosti životne sredine i uključenosti građana, posebno mladih, te ne smije biti na štetu ovih aspekata.

### 1. ZADRŽAVANJE MLADIH U TUZLI

Odlazak mladih nije samo problem Tuzle i Bosne i Hercegovine, nego cijelog Balkana i jugoistočne Evrope. Nažalost, većina mladih pa i ostalih građana iz Bosne i Hercegovine, odlazi zbog nepovoljnog političkog ambijenta u državi. Moj posao je da sačuvam stabilnost Tuzle. U stabilnoj Tuzli je moguće raditi i uspjeti. Mladima garantujem jednake šanse za uspjeh. Osim toga, želim ih iskreno uključiti u procese donošenja svih odluka u društvu. Nastavit ćemo sa posebnim mjerama zapošljavanja mladih. U tom kontekstu ćemo realizovati slijedeće aktivnosti:

- **Povećati sredstva u Budžetu Grada Tuzle za podršku projekta Siguran start** – na ovaj način ćemo podržati veći broj novoregistrovanih djelatnosti, posebno poduzetništva mladih i ženskog poduzetništva;
- **Povećati sredstva u Budžetu Grada Tuzle za podršku zapošljavanja ranjivih kategorija stanovništva** – na ovaj način ćemo povećati podršku pri zapošljavanju mladih nezaposlenih građana Tuzle kao jedne od posebno ranjivih kategorija stanovništva;
- **Nastaviti sa programima razvoja poduzetničkih ideja mladih** – na ovaj način ćemo podržati mlade nezaposlene osobe da razviju svoje poslovne ideje u poslovne planove, te da oni najbolji budu podržani kod registracije djelatnosti. Ovako ćemo kroz samozapošljavanje mladih osoba smanjiti nezaposlenost mladih i graditi još poduzetnije poslovno okruženje;
- **Nastaviti sa programima prekvalifikacije i stručnog osposobljavanja mladih nezaposlenih osoba** – na ovaj način ćemo unaprijediti konkurentnost mladih nezaposlenih osoba na tržištu rada i omogućiti im povezivanje sa poslodavcima koji su nam partneri na programima s ciljem dobijanja zaposlenja;
- **Nastaviti subvencioniranje kamata na kredite za rješavanje stambenih pitanja mladih** – na ovaj način će mladi biti stimulisani da ostanu u našoj Tuzli, zasnivaju porodice i privređuju;
- **Povećati broj mjesta u obdaništima** – potrebno je povećati broj obdaništa kako bi se povećao broj mjesta u obdaništima i stvorio još bolji ambijent za ostanak i život mladih, te mlade ohrabriti za zasnivanje porodice i povećanje nataliteta;
- **Organizovati i urediti co-working prostor za IT i druge biznise** – na ovaj način će na jednom mjestu mladi stručnjaci zajedno raditi i razmjenjivati ideje, te okrupnjavati svoje biznise;
- **Nastaviti sa kreiranjem još bogatijeg ambijenta za društveni i kulturni život i razvoj sporta** - kroz podršku manifestacijama iz oblasti kulture, sporta i društvenog života, kreirati još podsticajniiji ambijent koji će obilovati sadržajima

(npr. Festival mladih Kaleidoskop, Ljeto u Tuzli, Zima u Tuzli koji će popunjavati slobodno vrijeme mladih i učiniti njihov život kvalitetnijim;

- **Nastaviti sa kreiranjem novih sadržaja na Pannonici, u domovima kulture i društvenim domovima u mjesnim zajednicama, na Ilinčici, Staroj Majevidici** – na ovaj način će se još više unaprijediti ambijent koji povećava kvalitet života građana i mladih Tuzle; i još veliki broj drugih aktivnosti.

Ovo je samo jedan dio konkretnih aktivnosti koje ćemo realizovati za mlade, s ciljem stvaranja što podsticajnijeg ambijenta za njihov ostanak. Ovdje veliku ulogu imaju i nove tehnologije, te posebno BiT Centar Tuzla. Za nas su mladi najveći i veoma značajan resurs. Moramo nastaviti jedni druge podržavati i poticati da idemo naprijed, to su temeljne vrijednosti koje ćemo dalje razvijati u našoj Tuzli.

## 2. EKONOMSKI RAZVOJ

Godinama sam bio pomoćnik gradonačelnika za ekonomski razvoj. Na ekonomiji sam doktorirao, na osnovu moje višegodišnje prakse rukovođenja poslovima ekonomskog razvoja grada, kao i ranijim poslovima menadžera u realnom sektoru. Znam da ekonomski rast povećava kvalitet života građana, a to je za naše građane i građanke najvažnije. Tuzla je u proteklom periodu bilježila konstantan ekonomski rast u broju zaposlenih osoba, broju registrovanih privrednih subjektat, prihodu po glavi stanovnika, broju turista. Turizam i Panonska jezera su jedan od ključnih generatora ekonomskog razvoja. Dodatno ćemo razvijati ponudu i sadržaje na Panonici kao i turističku ponudu našeg grada. Ekonomski razvoj se veže i za mnoge oblasti, pa i za projekte poput Ljeta u Tuzli, Zime u Tuzli i skoro svakodnevnim privrednim, kulturnim i sportskim manifestacijama. Efikasnije ćemo raditi na izradi prostorno-planske dokumentacije i ubrzati rad gradske administracije na izdavanju potrebne dokumentacije za građenje i za rad privrednih subjekata. Unaprijedit ćemo rad postojećeg Centra za poduzetništvo i ojačati veze za našom dijasporom, koja može dati dragocjeni doprinos ekonomskom razvoju našeg grada. Radićemo na aktivnijem institucionalnom povezivanju sa dijasporom, sa krajnjim ciljem kreiranja uslova za uključivanje dijaspore u procese odlučivanja na lokalnom nivou, uz efikasnije zadovoljenje potreba dijaspore za uslugama koje pruža Gradska uprava Tuzle.

Neke od aktivnosti koje će se realizovati u okviru ove oblasti djelovanja su navedene i u tački 1. ovog Programa, gdje su bliže opisane. Zbog značaja ćemo ih pobrojati i u ovoj oblasti. S ciljem stvaranja još boljeg ambijenta koji će doprinijeti bržem ekonomskom rastu, realizovat će se slijedeće aktivnosti:

- **Povećati sredstva u Budžetu Grada Tuzle za podršku projekta Siguran start;**
- **Povećati sredstva u Budžetu Grada Tuzle za podršku zapošljavanja ranjivih kategorija stanovništva;**
- **Dalje razvijati programe razvoja poduzetničkih ideja**

Pored toga, planiramo i slijedeće aktivnosti:

- **Ubrzati razvoj poduzetničkih zona** – na ovaj način će se podržati razvoj privrede i privlačenje investicija, povećati broj radnih mjesta i broj registrovanih djelatnosti;



- **Dalje razvijati podršku poljoprivrednim gazdinstvima i obrtima** – veoma značajan segment ekonomskog razvoja putem koga se podržavaju poljoprivredna gazdinstva i obrti u nabavci sadnog materijala, gnojiva, đubriva kao i kapitalne investicije u poljoprivredi;
- **Podržavati nevladine organizacije u oblasti poduzetništva i poljoprivrede** – na ovaj način se, putem vlastitih udruženja, poljoprivredni proizvođači i poduzetnici dodatno edukuju, te upoznaju sa trendovima u ovim oblastima. Tako postaju još konkurentniji na tržištu i povećavaju efikasnost i efektivnost u svome radu;
- **Unaprijediti podršku JP RPC Tuzla – Inkubator Lipnica i JP BIT Centar Tuzla** – kako bi se ponudili još bolji uslovi za rad i razvoj, posebno start-up kompanija;
- **Još brže razvijati oblast turizma kroz povećanje broja manifestacija i sadržaja** – na ovaj način će se povećavati broj gostiju, turista što će doprinijeti daljem razvoju sektora hotelijerstva, ugostiteljstva, trgovine, drugih komplementarnih djelatnosti. Radit ćemo na dodatnoj ponudi Pannonice, unapređenju manifestacija Festival Kaleidoskop, Ljeto u Tuzli, Zima u Tuzli, te drugih manifestacija koje generišu još bogatiju turističku i drugu ponudu, i generišu povećanje broja turista; i drugi veliki broj aktivnosti vezanih za kvalitetnije obrazovanje, ugodniji ambijent života građana itd.

### 3. KOMUNALNA INFRASTRUKTURA

Osnovni cilj komunalne gradnje, obnove i održavanja jeste učiniti građanima kvalitet života boljim. Ovo će biti jedan od primarnih pravaca mog rada. Komunalna infrastruktura će se graditi u svih 40 mjesnih zajednica grada Tuzle. Niko neće biti izostavljen. U okviru ove oblasti realizovat će se slijedeće aktivnosti:

- **Do kraja 2024. godine u izgradnju komunalnih objekata i komunalne infrastrukture izdvojiti iz Budžeta najmanje 25 miliona maraka** – na ovaj način će se unaprijediti i proširiti mreža komunalnih objekata i komunalne infrastrukture koja je od ključnog značaja za kvalitet života građana, ali i za kvalitetan ekonomski razvoj. U ovom smislu ćemo širiti mrežu puteva, ulične rasvjete, vodovodnu i kanalizacionu mrežu, mrežu sistema centralnog daljinskog grijanja, itd.
- **Do kraja 2024. godine izdvojiti minimalno 10 miliona KM na tekuće održavanje postojeće komunalne infrastrukture i komunalnih objekata;**
- **Povećati broj parking mjesta** – obzirom na ekonomski razvoj i razvoj turizma u Tuzli, te sagledavanje Tuzle kao privrednog, administrativnog, ekonomskog, univerzitetskog, zdravstvenog, kulturnog, sportskog i historijskog centra Tuzlanskog kantona i sjeveroistočne BiH u koga svakodnevno dolazi i do nekoliko hiljada ljudi potrebno je hitno raditi na projektima unapređenja saobraćaja u mirovanju.
- **Unaprijediti kvalitet saobraćaja u kretanju** – izgradnja dodatnih kružnih tokova se nameće kao jedno od najprihvatljivijih rješenja, te ćemo u tom pravcu i ići. Takođe, potrebno je što prije pristupiti izradi studije kvalitetnog rješavanja saobraćaja u kretanju od strane stručnih lica, kako bi se saobraćajni kolapsi i velike gužve u saobraćaju svele na što manji obim. Ovo je bitno i sa aspekta ekologije i emisije CO<sub>2</sub>.

- **Izgraditi i poligon za obuku vozača** – ovo je prijeka potreba kako bi se obuka vozača u auto školama podigla na još viši nivo;
- **Završiti aktivnosti na izgradnji Gradskog groblja Drežnik**– ovo je jedan od veoma značajnih, ako ne i najznačajniji komunalni projekat. Svi znamo zašto;
- **Započeti aktivnosti na realizaciji dugoročnog projekta izgradnje magistralnog vrelovoda** – na ovaj način će se početi stvarati pretpostavke bržeg povećanja kapaciteta mreže daljinskog grijanja i njenog širenja;
- **Još kvalitetnije uticati na ubrzavanje postupaka rješavanja ulaska u naš grad iz pravca zapada** – ovdje se posebno misli na kružni tok kod TE Tuzla i povezivanje sa petljom Šićki Brod. Iskoristiti sve pravne mogućnosti kako bi JP Ceste Federacije BiH što prije završile ovaj projekat i povezali ulazak u naš grad sa zapada u jednu cjelinu.
- **Odmah tražiti od Vlade FBiH i JP Ceste Federacije BiH da pristupe izgradnji dijela južne saobraćajnice od raskrsnice Ši Selo do Slavinovića, a zatim do Simin Hana** – odmah tražiti od Vlade FBiH da donesu odluku o proglašenju javnog interesa na ovoj trasi puta, da obezbijede sredstva za procese eksproprijacije, te da počnu sa izradom glavnog projekta, ishodovanja dozvola i obezbjeđenju sredstava za gradnju.
- **Maksimizirati napore na eksproprijaciji parcela na trasi autoputa Tuzla-Brčko-Orašje;**
- **Unaprijediti higijenu grada i održavanje zelenih površina;**
- **Ugraditi LED sijalice na minimalno 800 rasvjetnih tijela putne javne rasvjete;**
- **Ugraditi LED sijalice na minimalno 600 rasvjetnih tijela parkovske javne rasvjete;**
- **Izgraditi nova dječija igrališta;**
- **Opremiti dječija igrališta sa spravama adekvatnim za djecu sa poteškoćama u razvoju;**
- **Unaprijediti sistem svjetlosne signalizacije, kroz zamjenu semaforских kontrolora i ugradnju zvučnih tastera na semaforima u cilju boljeg protoka i sigurnijeg odvijanja saobraćaja na Sjevernoj saobraćajnici** – realizacijom ove aktivnosti će se poboljšati pristup osobama sa invaliditetom primjenom tastera sa kapacitivnim senzorum za najavu pješaka, te povećati sigurnost učesnika u saobraćaju, obezbijediće se bolji protok saobraćaja, regulacija odvijanja saobraćaja na kritičnim raskrsnicama, uz efekte smanjenja potrošnje energenata, smanjene emisije štetnih plinova i smanjenje gubitka vremena u saobraćaju.
- **Započeti implementaciju pametnih rješenja za upravljanje javnom rasvjetom** – na ovaj način će se stvoriti dodatne uštede u budžetu, a i kvalitetnije upravljanje;
- **Dalje razvijati i širiti mrežu toplifikacije, vodovodnu i kanizacionu mrežu;**
- **Unaprijediti nadzor nad održavanjem postojeće infrastrukture, posebno prilikom izvođenja radova i vraćanja u prvobitno stanje.**

## 4. OBLAST EKOLOGIJE

Za mene je ekologija i čist zrak veoma važna ako ne i najvažnija oblast mog budućeg rada. Dosta smo uradili u ovoj oblasti. Zahvaljujući subvencijama Grada Tuzle preko 1.000 objekata više ne koristi peći na ugalj, smanjili smo emisiju CO<sub>2</sub> za 33,44% (prema



zvaničnim mjerenjima za period od 2003. do 2020. godine), imamo najbolje i najjeftinije grijanje u BiH putem sistema daljinskog grijanja. Posebnu pažnju ću posvetiti higijeni grada, održavanju i povećavanju zelenih površina, koje treba da bude još bolje organizovana i realizovana. U okviru ove oblasti nastavićemo dosadašnje i realizovat dodatne aktivnosti:

- **Sufinansirati ugradnju toplotnih pumpi;**
- **Sufinansirati ugradnju peći na pelet;**
- **Sufinansirati priključenje na mrežu centralnog daljinskog grijanja;**
- **Sufinansirati utopljanje energetske neefikasne individualnih stambenih objekata;**
- **Započeti sa sufinansiranjem utopljanja kolektivnih stambenih objekata koji su energetske neefikasni;**
- **Otvoriti novu liniju podrške kojom će se sufinansirati ugradnja fotonaponskih panela;**
- **Otvoriti novu liniju podrške kojom će se sufinansirati socijalne kategorije stanovništva u procesu energetske efikasnosti njihovih kuća;**
- **Unaprijediti aktivnosti na odvozu smeća i higijeni grada – obezbijediti dodatni broj kontejnera, kanti za smeće, više educirati građane o značaju selekcije otpada na izvoru, itd.**
- **Unaprijediti saobraćaj u kretanju kako bi se smanjila emisija CO<sub>2</sub>;**
- **Svim sredstvima tražiti što hitnije implementaciju projekta ugradnje uređaja za odsumporavanje u TE Tuzla;**
- **Promovisati što veću upotrebu obnovljivih izvora energije.**

## 5. DIGITALIZACIJA JAVNE UPRAVE

Obzirom da sam doktorirao baš na ovoj užoj naučnoj oblasti, radit ću na uspostavi efektivnog upravljačkog i organizacionog okvira informatizacije i digitalizacije administracije Grada Tuzle, kako bismo dobili još efikasniju, transparentniju i odgovorniju javu upravu, javnu upravu koja u fokusu ima svoje građane, privredne subjekte i njihove potrebe. Iako sporijim tempom, zbog nedostatka zakonske regulative, kao glavni servis građana u skladu s izazovima digitalnog doba, i državna se infrastruktura mora prilagoditi digitalnom civilnom društvu i izazovima vremena.

- **Unaprijediti otvorenost i dostupnost informacija javne uprave – na web portalu Grada Tuzle napraviti nove banere sa servisnim informacijama, preurediti okvir za javne rasprave, javne pozive i javne oglase, itd.;**
- **Olakšati prijavu komunalnih i drugih problema putem mobile friendly aplikacije;**
- **Unapređenje dvosmjerne komunikacije sa građanima – posebno u odgovoru na upite, kao i na platformi “Centar 72”;**
- **Omogućiti adekvatniju upotrebu sistema DMS (Sistem upravljanja dokumentima) u gradskoj administraciji, kako bi stranke mogle pratiti status predmeta u rješavanju; i mnoge druge aktivnosti;**

- **Uvesti nove tehnologije u javnim preduzećima i javnim ustanovama** – na ovaj način će se još više povećati kvalitet usluga, transparentnost u radu, smanjit će se troškovi poslovanja i uvesti bolji kvalitet upravljanja procesima.

Sve ove aktivnosti vođene novim tehnologijama će dovesti do unapređenja transparentnosti u radu, što će povećati integritet rada Gradske uprave i unaprijediti povjerenje građana u javnu upravu.

## 6. DALJI RAZVOJ AMBIJENTA ZA KVALITETAN ŽIVOT GRAĐANA

Svjestan sam značaja daljeg poboljšanja ambijenta života u našem Gradu. Kao dugogodišnji sportista volim sport i rekreaciju. Vjerujem da svi zaslužujemo još bolji ambijent za život i bolju infrastrukturu, na nama je da je vrlo jasno implementiramo. Iako smo do sada puno toga uradili, potrebno je raditi još više. Za Panonska jezera se već može reći da su izgrađen brend i ona govore sama za sebe, po njima je danas Tuzla prepoznatljiva u BiH i svijetu.

- **Socijalna politika (jednokratne pomoći, izdvajanja za pomoć socijalno ugroženim, Centar za socijalni rad...**
- **Politika prema boračkoj populaciji**
- **Značaj NVO u oblasti socijalne politike...**
- **Nastavit ćemo se boriti za prava osoba treće životne dobi, za kvalitetniji život penzionera** - nastavićemo sa projektom Njega i pomoći u kući, te podržavati aktivnosti nevladinih organizacija namijenjene osobama treće životne dobi, kao i aktivnosti mreže aktivnog starenja u mjesnim zajednicama, kao i mnoge druge.
- **Dalje unapređivati i uvećavati ponudu Panonskih jezera;**
- **Unapređenje ponude na llinčici u vidu adrenalin parka** – napraviti vještačku stijenu za penjanje i zip-line;
- **Nastaviti sa daljim uređenjem prostora mjesnih zajednica i domova kulture** – na ovakav način će se stvarati bolji ambijent za podjednak kvalitet života na cijeloj teritoriji grada;
- **Nastaviti sa gradnjom dječijih i sportskih igrališta;**
- **Na dječijim igralištima ugrađivati sprave koje su prilagođene djeci sa poteškoćama u razvoju;** i mnogi drugi projekti;
- **Podrška razvoju amaterskog sporta u cilju obuhvata što većeg broja djece i mladih i stvaranja uslova za bavljenje nekom vrstom sporta...**
- **Unapređivati saradnju sa nevladinim sektorom, sportskim i kulturnim institucijama, s ciljem organizacije još većeg broja manifestacija koje čine život građana još kvalitetnijim** – Festival Kaleidoskop, Pozorište mladih, Kuća plamena mira, kulturno-umjetnička društva, itd.
- **Dalje raditi na unapređenju tradicionalnih, regionalno poznatih manifestacija Iterbifepa i Cum Grano Salis;**
- **Unaprijediti rad Narodnog pozorišta i Centra za kulturu** – povećati broj manifestacija i predstava koje se realizuju i učiniti ih dostupnijim na cijeloj teritorija grada i što većem broju građana

- **Razvijati dalje turizam na lokacijama Ilinčica, Zeleni Kamen, Stara Majeвица i Kicelj i kreirati nove turističke sadržaje**

## **7. ZAJEDNIČKI ŽIVOT I TEKOVINE ANTIFAŠIZMA**

Ustav naše države garantuje svim njenim građanima osnovna ljudska prava i slobode. Tuzla je jedini svijetli primjer u Bosni i Hercegovini koja u kontinuitetu baštini njegovanje tradicije zajedničkog života i antifašizma. Daleke 1920. godine rudari sa područja Husina, Lipnice i Morančana su podigli Husinsku bunu kako bi zaštitili radnička prava. Tuzla je poznata po zajedničkom životu i tekovinama antifašizma u cijeloj Evropi i svijetu. To smo dokazali tokom narodno-oslobodilačke borbe, a i tokom odbrambeno-oslobodilačkog rata 1992-1995. godina. Malo je ljudi u tragičnoj i krvavoj historiji Bosne koji zaslužuju da im se ime pamti i spominje kao što je to ime uglednog i istaknutog muslimanskog učenjaka Muftije Muhameda Šefket-efendije Kurta, koji je nesebičnim zalaganjem u januaru 1942. spasio hiljade tuzlanskih Srba od pokolja.

Nastavit ćemo sa obilježavanjem svih značajnih datuma koji su vezani za ovu oblast. Podržavat ćemo projekte i manifestacije iz ove oblasti i praviti tribine. Tuzla mora ostati dosljedna svojim principima po kojima je jedinstvena i poznata u cijelom svijetu. Svi građani tuzle moraju biti kao jedan kada je riječ o zajedničkom životu i tekovinama antifašizma.

Na kraju moram da istaknem da su ovo samo najznačajnije aktivnosti koje će biti u fokusu moga rada. Siguran sam da će broj aktivnosti koje će se realizovati o ovom periodu biti dosta veći, jer su to građanke i građani Tuzle zaslužili.